

# Spustà la parola da votaziun

L'organisaziun dals purs da bio n'è betg unida en la valitaziun da l'iniziativa per aua netta

DAD ANDREAS CADONAU/FMR

■ Il president da Bio Grischun e commember da la suprastanza da Bio Suisse, Claudio Gregori, è conscient dal dilemma da las organisaziuns dals purs da bio en connex cun la parola per l'iniziativa per aua netta che va en votaziun la stad proxima. La radunanza da delegads da Bio Suisse ha spustà la decisiun per ina parola da votaziun. Duas iniziatives che tractan respectiv che vulan scumandar il diever da pesticids en Svizra, èn sin il binari da votaziun l'onn proxim. Tar l'iniziativa «Ina Svizra senza pesticids sintetics» che pretenda in scumond general per duvrar pesticids en Svizra, ha la radunanza da delegads da Bio Suisse da l'emna passada decis in gea. Ina iniziativa che sa cumportia cun las finamiras da la produziun ecologica, sco quai ch'il president da Bio Grischun e commember da la suprastanza da Bio Suisse, *Claudio Gregori* ha explitgà. Pli dispitaivla tar l'organisaziun da las puras ed ils purs da bio è la uschenumnada «Iniziativa per aua netta».

## Sclerir detagls

Tant la suprastanza da Bio Grischun sco da Bio Suisse han cusseglià a delegadas e delegads da proponer in na a la iniziativa. Ina opiniun ch'ina buna part da delegadas e delegads n'han betg vuli sustegnair. Uschia che las 100 delegadas e delegads da la radunanza digitala da Bio Suisse da l'emna passada èn sa decidids da spustar quella decisiun sin la primavera. «Per pudair sclerir intgins detagls da las pretendiuns da l'iniziativa e per pussibilitar a delegadas e delegads ina discussiun reala». Claudio Gregori è conscient dal dilemma



**Claudio Gregori è sceptic dad introducir l'agricultura biologica en Svizra via l'urna.**

FOTO ANDREAS CADONAU

da l'organisaziun da l'agricultura ecologica en Svizra da proponer in na ad ina iniziativa che pretenda aua netta. «Tgi vul nagina aua schubra?» Gregori ha menziunà diversas pretendiuns da l'iniziativa cun severas prescripziuns vers l'agricultura che pertutgan era l'agricultura da bio. L'iniziativa pretenda tranter auter da stipular en la costituziun federala la pretendiun da pajar contribuziuns sulet a manaschis che produceschan il pavel per lur animals sin l'agen manaschi. «Quai n'è betg pussaivel a l'entira produziun da bio.» Per exempel ha Claudio Gregori numnà la produziun dad ovs da bio. «A tals manaschis n'èi

## Duas iniziatives che scumondan pesticids

Il suveran svizzer vegn a decider l'auter onn davart duas iniziatives che vulan scumandar da duvrar pesticids en Svizra. L'iniziativa «Per ina Svizra senza pesticids» na vul betg sulet scumandar da duvrar pesticids sintetics en l'agricultura ed en la tgira dal terren e da la cuntrada. Ella vul era scumandar d'importar mangiativas producidas u elavuradas cun pesticids sintetics. La «Iniziativa per aua netta» vul che la Confederaziun sustegna sulet manaschis purils che produceschan senza pesticids e che produceschan il pavel per lur animals sulet sin l'agen manaschi. Ed ils manaschis na dastgan betg duvrar a moda profilactica antibiotica. Il Parlament federal propona da renviar omaduas iniziatives.

betg pussaivel da producir il pavel per lur giaglinas sin l'agen manaschi.»

## Validità il text per relevant

Bain existan pretendiun nà dad iniziantas ed iniziants ch'i saja pussaivel dad introducir excepziuns entaifer la legislaziun dal parlament. Per il president da Bio Grischun e commember da la suprastanza da Bio Suisse è dentant il text da l'iniziativa relevant. «Decisiva è la formulaziun dal text, respectiv da l'artitgel pretendì da l'iniziativa per la costituziun.» E quai è per Gregori il motiv da proponer in na a l'iniziativa per aua netta. Da principi è Clau-

dio Gregori in pau sceptic dad introducir l'agricultura da bio en Svizra via l'urna. E quella introduziun succedia politicamain sch'ina da las duas u almain omaduas iniziatives vegnan acceptadas l'onn proxim. Sceptic vers la via politica è il president da Bio Grischun era sch'ina da las finamiras da Bio Suisse saja da midar l'entira agricultura svizra en ina agricultura da bio. Gregori ha fatg attent a la cumpart da 10 procent da products da bio sin la fiera da mangiativas en Svizra. «Quella cumpart stat en cuntradicziun ad ina pussaivla maiorità da 51 procent che decida eventualmain a favur da las u dad ina iniziativa.» Pli simpatic fiss per Gregori sch'il consument introduciss l'agricultura da bio via stizun e centers da cumpra. «Cun cumprar consequent products da bio vegn l'agricultura da bio introducida automaticamain era vers il products importads.»

## Dumonda dal pretsch

La cumpart da bio sin la fiera da mangiativas crescha bain, il motiv principal per blers consumers da tuttina desister da bio è il pretsch dal product. Cler ch'in gea a las iniziatives augmenta ils pretschs da las mangiativas, almain da quellas producidas en Svizra. Claudio Gregori ha menziunà la discussiun actuala en ils gremis da las organisaziuns per ina agricultura ecologica. «Pon ins numnadamain adossar sin ina moda u l'autra ils donns da la agricultura convenziunala chaschunads vers umans e natira al pretsch dal product convenziunal, è quest product convenziunal in di pli char ch'il product da bio.» Quai para la via futura dad introducir l'agricultura ecologica en Svizra via il product e betg via l'urna.